

Date – 25/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizoram sorkarin a thawhnhnihna atana sawhthing a lei mekah Mizoram hmun hrang hrangah sawhthing lei chhunzawm zel a ni.**
- 2. Hun engemawti chen Tui lama Lunglei mipuiin harsatna an tawh hnuah ruahrawn sur avang khan harsatna chuan ziaawm lam a pan chho .**
- 3. Ramchhunga political party hruaituten politics boruak dah thain Pahalgam firfiaka chetna avanga Cabinet Committee on Security in Pakistan lakah hma a lakna an thlawp.**
- 4. Army hotulu ber General Upendra Dwivedi chuan vawiinah Jammu & Kashmir a tlawh dawn.**

<><><>

GINGER

Mizoram sorkarin a thawhnhnihna atana sawhthing a lei mekah Mizoram hmun hrang hrangah sawhthing lei chhunzawm zel a ni a.

Nimin khan Chhiahtlang Secondary Collection Centre (SCC)-ah sawrkar chuan Serchhip District Agriculture Marketing Board (DAMC) kaltlangin loneitute sawhthing thar chhuah chu a thawhnhnihnan a lei tan a.

SCC te hian an bial theuha khaw hrang hrang te tharchhuah beisei zat leh SCC kudama leng thei zat chhut chungin lei zat tur an siam a. Serchhip District-ah vawiin atangin hmalak chhunzawm a ni. Chhiahtlang SCC bikah chuan tun karah hian Hriangtlang, Chhiahtlang leh New Serchhip South sawhthing te lei tan a ni a, tun karah hian Bag 2000 buk zawh hman tum a ni.

Champhaiah pawh Champhai Agriculture Department chuan vawiin thlengin sawhthing quintal 2179.81 a lei tawh a. Agriculture Department atanga thudawn danin, Champhai District chhungah hian Secondary Collection Centre pali leh Cold Storage 1 ah te sawrkar thuchhuak angin February leh March thla chhunga sawhthing la hralh ve miah lo khuate leh cho tawh si, la hralh ve hman lo te sawhthing chu tun tumah hian leisak an ni a, Hnahlan Secondary Collection Centre-ah kg 31,670 buk a ni a, Mualkawi Secondary Collection Centre ah Kg. 63081 buk niin Champhai DCSO Godown ah Kg 77,035 buk a ni a, Ramhrangkawn Secondary Collection Centre-ah Kg. 3,800 buk niin Cold Storage ah Kg. 42,395 buk a ni bawk.

<><><>

MZP VISIT BUHCHANGPHAI

Assam Forest dept ten Buhchangphai khaw chhûng Chhimluang, Ramthar zau panna lei siam mêk chawlsan tura an tih avangin nimin khan MZP General Headquarters chuan Buhchangphai an tlawh a,

MZP sawi danin, Buhchangphai khawchhung Chhimluang lui, Ramthar Zau panna lei chu a that tâwk loh avângin, Mizoram sawrkar chuan Minor Irrigation hnuaiiah RCC leilawn an siam mêk a. Chhimluang lui lehlahmah hian Buhchangphai khaw miten huan lo ram neiin, ei leh bâr zawn nan an hmang a. Heng huan lo ramte hi Mizoram Land Revenue & Settlement Department hnuaiiah LSC neiin, chhiah pawh Mizoram sawrkar hnuaiiah an pê a. Buhchangphai V.C ram pass nei engemaw zât an awm bawk.

Heng huan neitute mamawh lei Mizoram sawrkar hnuaiia dawh that mêk hi, Assam Police leh Assam Forest ten nimin khan an tlawh a. Assam ram chhûng nia sawiin, hna thawh mêk hi tâwpsan nghal turin an hriattîr bâkah, Assam Katlichera D.C chuan Stay order a chhuah nghal bawk.

He thil thleng hi MZP chuan a hmunah tlawhin Buhchangphai V.C. te nen thil thlen dan an sawiho a. MZP chuan Mizoram chhung ngeia Assam lamin thuneih an tum fo chu hriatthiam har an tih thu an sawi a. Ram humhalh turin theihtawp a dodal zel ni se an ti.

MZP chuan Mizoram sawrkarin, Mizoram ramri dep kuate hmasâwnna hna an thawk chu lâwmawm an tih thu an sawi a. Hetihruah hian hetiang State dangin ramri an rawn nêkna hi na taka chhanglet zêl turin a ngên a, ramri dep khuua hmasâwnna hnathawh leh hmalâkna hrang hrangah khawthlang hruaitute hriattîrin thawhpui thin se an duh thu an sawi bawk a ni.

<><><>

WATER SCARCITY

Hun engemawti chen Tui lama Lunglei mipuiin harsatna an tawh hnuah ruah rawn sur avang khan harsatna chuan ziaawm lam a pan chho mek a.

Tun dinhmunah PHE chuan tui an Pump rei ve leh tan tawh a, ni 17 atang khan darkar 23 an pump thei a, tunah chuan darkar 24 te pawh an pump thei tawh a ni. Motor hmanga tuisem pawh tih tawp a ni tawh a, sumdawn nan a tuichawi leh hralh erawh hun pangngai angin an awm ve reng tho a ni. Tui van lai a PHED ten tui sem nan khan cheng Nuai 5 vel an hmang niin kan corr chuan a sawi a ni.

Hetihlai hian Pialthleng atanga tui pump-na AMRUT 2.0 sum cheng Vbc 4 leh nuai 70 hmanga Tlawng lui khuah mek chu Mizoram State Project Monitoring Committee (MSPMC) chuan an tlawh a. MSPMC te hian tha thei ang ber a hnathawk turin Contractor an hrih a, hmanhmawh vanga phuailuai taka ti lo tur in an hrih a ni.

<><><>

EDN MINISTER VISIT CADC

School Education Minister Dr Vanlalhlalan Chakma Autonomous District Council a tlawh mek a,

He hunah hian CADC sorkar chuan Govt. Kamalanagar Higher Secondary School-ah Science leh Commerce zirna hawng turin an ngen a, CADC huam chhunga sorkar zirna in sang awm chhun a ni tih sawiin, an

higher sec school neih chungah arts subject chauh a zir theih avangin naupang ten an tuar a ni an ti a ni.

Heng bakah hian Samagra Shiksha hnuah Kamalanagar Block-a zirtirtu dah te chu office lama sawn a nih zel avang leh zirtirtu ten an awmchilh hreh deuh zel avangin thingtlang kilkhawrah pheih chuan zirna in te chu zirtirtu pakhat chauhin a khai din te pawh an awm a ni an ti.

CADC chuan an huamchhunga zirna inah te Mizo subject laktir an duh tih an sawi a, Mizo chu official tawng anih avangin an tan thiam a pawimawh a, hei bakah hian tawng inang khat hman chuan Mizo te nena an inkara inbiaktawh theih lohna emaw, chi leh chi inkara inhruithiamna te emaw a awm phah dawn a ni an ti.

School Education Minister hian Kamalanagar a zirna in hrang hrang te a tlawh a, zirtirtu leh khawtlang hruaitute pawh a kawm nghal a ni.



MNYF&KOLASIB DC

Kolasib DC, District Magistrate Pu Robert C. Lalhmangaiha leh Mizo National Youth Front (MNYF) General Headquarters hruaitute chu tunhnaia Polytechnic Building, Thingdawl atanga Kuhva ro hralh chhuah chungchangah nimin Khan Kolasib DC Conference Hall-ah an inkawm.

MNF thalai (MNYF) Gen Hqrs. hruaitute chuan Thingdawl Polytechnic Building-a Kuhva ro dahkhawm, Kolasib District Magistrate-in a tihral chungchang bawhzuiin, a hmunah thil awmdan an enfiah a. He hun ah hian Kolasib SP Pu David H. Lalthangliana, leh Pu H. Lalramliana, SDO(S), Kolasib te chuan lo dawngsawngin, hun engemaw chen an inbiak hnuah MNYF hruaituten an duh angin Polytechnic Building-a Kuhva ro dah khawm chu an enfiah.

MNYF hruaitute chuan DC chu Kuhva tihral chungchanga zawhna an neih te zawtin, Kolasib District Magistrate chuan a hmalak dan sawiin Kuhva ro chu khapna thuchhuah hmanga man a nih dan te, Kolasib District Court-in District Magistrate hnenah Kuhva man sate tiral tura thuneihna a pek anga tihral a nih thu leh tihralna tura kalphung tha bera a hriat angin District Magistrate-in hma a lak dan te sawi fiah a ni.

Kolasib SP Pu David H. Lalthangliana chuan, Vairengte Kudam atanga Kuhva ro Bag engemawzat bo chungchanga hmalak a nih dan leh thil awmdan te, Deputy Magistrate-in khapna thupek a tihchhuah hma avanga hmalak chhonzawm a nih loh dante pawh Kolasib SP Pu David H. Lalthangliana chuan a sawi fiah a ni.

MNYF hruaituten an dil angin Thingdawl Polytechnic Building atanga Kuhva ro hralh chhuah chungchanga District Court thurel dan te, District Magistrate-in tiral tura hma a lak dan leh lillam a nihna lehkhawh pawimawhte chu Pu Robert C. Lalhmangaiha, District Magistrate chuan MNYF hruaitute hnenah hian a hlan a.

Kolasib District Magistrate, SP leh MNYF hruaitute an inkawm zawh hian boruak tha tak hnuaiah an in then ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ALL PARTY MEETING

Ramchhunga political party hruaituten politics boruak dah thain Pahalgam firfiaka chetna avanga Cabinet Committee on Security in Pakistan lakah hma a lakna an thlawp. Nimin khan sawrkar laipui chuan Pahalgam inbeihna chungchangah hian political party tin aiawh inhmukhawm a ko a. New Delhi-a Parliament House Complex-a inhmukhawmah hian party hruaitute chuan sawrkar chu firfiakte a dona kawngah leh hma a laknahte an thlawp thu an sawi.

Union Parliamentary Affairs minister Kiren Rijju chuan party hruaitute hian firfiaka chetna chu an ngaih thutak tu leh sawrkar an thlawp thu an sawi a ti a. He inhmukhawmah hian Defence Minister-in party hruaitute hi Pahalgam thil thlen dan leh sawrkar cabinet committee on Security Meeting hmalak dan a sawifiah tih a sawi.

Inhmukhawm zawha chanchinbumite a kawmnaah Lok Sabha Leader of Opposition Rahul Gandhi chuan Pahalgama firfiakte chetna chu dem thu leh opposition te chuan sawrkar hmalaknate an thlawp thu a sawi.

Congress President Mallikarjun Kharge pawhin party tinten firfiaka chetna an dem thu a sawi a. Jammu and Kashmir ah remna leh muanna a awm theih nan hmalak a tul thu a sawi a ni.

He inhmukhawma tel TMC Leader Sudip Bandyopadhyay te, Aam Aadmi Party MP Sanjay Singh leh AIMIM MP Assaduddin Owaisi te pawhin sawrkar an thlawp thu an sawi vek a. Darkar 2 chuang thutkhawmah hian Political party 13 atangin aiawh an tel thei a ni.

<><><>

ARMY CHIEF

Army hotulu ber General Upendra Dwivedi chuan vawiinah Jammu & Kashmir a tlawh dawn. Thudawn danin Pahalgam firfiaka chetna thleng avangin General Dwivedi hian J&K hi a tlawh dawn a. Venhimna dinhmun hrang hrangte a enfiah dawn a ni. Sipai hotuten firfiakte dona kawngah an inbuatsaihna leh hma an lakna hrang hrangte lo hrilhfiyah a ni ang.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 121-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

